



BILTEN


OPĆINE SREBRENİK



IZDAJE: OPĆINA SREBRENİK • BROJ: 23 • MJESEC: APRIL/TRAVANJ 2008. • BILTEN JE BESPLATAN • TIRAŽ 500



1333. - 2008.



675. ROĐENDAN GRADA SREBRENİKA



ZNAČAJNI DATUMI

Obilježen Dan nezavisnosti BiH



Sa svečane akademije održane povodom 1.marta, Dana nezavisnosti BiH

U «Plavoj sali» Doma kulture u Srebreniku, 1. marta održana je svečana akademija, kojom je na prigodan način obilježen Dan nezavisnosti Bosne i Hercegovine. Ovoj manifestaciji prisustvovali su vijećnici Općinskog vijeća Srebrenik, te predstavnici boračkih udruženja, privrednih kolektiva i javnih ustanova s područja srebreničke općine. Još u vrijeme dok su se ratno-huškačke političke pozicije u našem susjedstvu, istakao je u svom referatu općinski načelnik Osman Suljagić, iskazivale u svom najjačem intenzitetu, konstitutivni narodi BiH pokušavali su tražiti rješenje za buduću državotvornu zajednicu.



Amar Ibrić je odrecitovao pjesmu posvećenu Danu nezavisnosti BiH

Nakon brojnih bezuspješnih pokušaja da se nađe kompromis, narodi BiH su odlučili da referendumskom odlukom svojih građana traže rješenje za pomenuti problem. Iako se na referendumu oko 65 posto građana, među kojima je pored Bošnjaka i Hrvata bio i znatan broj Srba, izjasnilo za nezavisnu BiH, dodao je Suljagić, mračne snage, predvođene Slobodanom Miloševićem, koje se nisu mogle pomiriti s ovakvom voljom građana, pokrenule su agresiju na Bosnu i Hercegovinu.

SJEĆANJE NA BORCE ZA NEZAVISNOST

U okviru obilježavanja ovog datuma, delegacija Općine Srebrenik i boračkih udruženja, položila je cvijeće na spomen-obilježja poginulim borcima s područja općine Srebrenik u odbrambeno-oslobodilačkom ratu 1992-1995.g i narodno-oslobodilačkom ratu 1941-1945.g., te minutom šutnje odnosno učenjem Fatihe, odala počast našim najboljim sinovima, nakon čega su se učenici osnovnih škola predstavili bogatim kulturno-umjetničkim programom.



Učenici osnovnih škola su priredili bogat kulturno umjetnički program

Zbog toga se opredjeljenje građana, iskazano na referendumu, prema riječima Suljagića, moralo potvrditi u odbrambeno-oslobodilačkom ratu, u kojem su progresivne snage, uz velike žrtve i odricanja, uspjele sačuvati stečenu nezavisnost i državnost BiH. Zbog svega toga Bosna i Hercegovina je bila i biti će, bez obzira na one koji ne slave i na sve načine pokušavaju obezvrijediti ovaj datum, jer svi znamo da im je jedini cilj rasturanje naše domovine. Bez obzira na sve boli koje nosimo, na svu nepravdu koju smo doživjeli i dan danas doživljavamo, ovaj dan je naš dan, dan naše domovine, dan koji se treba slaviti, ali iznad svega dan koji se treba POŠTOVATI. U ovom momentu neka nam misli budu uz sve nevine žrtve, koje su svoj život izgubile u agresiji na BiH, neka nam misli odlete do svake majke koja je izgubila svoje najdraže, i u ovom momentu trebamo se sjetiti sve i jednog borca Armije BiH i naših ratnih vojnih invalida, kazao je Suljagić.

SJEDNICE OPĆINSKOG VIJEĆA

Vijećnici zaustavili poskupljenje vode



Sa 41.sjednice OV: Zaustavljeno poskupljenje vode

Na 41. sjednici Općinskog vijeća Srebrenik odbijen je zahtjev JP «Vodovod i kanalizacija» da dođe do poskupljenja vode od 2%, ali je odobreno načelniku Općine da iz tekuće budžetske rezerve izdvoji određena sredstva kako bi se namirili gubici ovoga preduzeća, kako to ne bi na svojim leđima osjetili građani. Ipak, do poskupljenja usluga odvoza smeća je došlo, ali ne u onoj mjeri kako je zahtijevalo JKP «9.septembar». Tako će umjesto planiranih 6,76 KM, cijena odvoza smeća van Centra i prigradskih naselja biti jedinstvena od 6,20 KM, a da će se preostala razlika namiriti također iz budžetskih rezervi. Vijećnici su dali saglasnost da se Mješovitoj srednjoj školi, na privremeno korištenje, ustupi zemljište kod Gradskog stadiona za potrebe poljoprivrednog odjeljenja, kao i objekat «Lipici» na Majevidi, koje će koristiti Planinarsko društvo «Majevidica», dok je usvojen i Nacrt odluke o prosječnoj građevinskoj cijeni kvadratnog metra korisne stambene površine. Usaglašen je i Program zaštite životne okoline na ovom općinskom području, te Rješenje o preuzimanju gradskog građevinskog zemljišta tzv. «Koprić-bašča» gdje se treba započeti sa izgradnjom raskrsnice za spajanje na Regionalni put Srebrenik-Gračanica. Jedanaest novoizgrađenih vodovodnih krakova proglašeno je javnim dobrima. Uz protivljenje vijećnika SDA te saglasnost predstavnika SDP-a, SBiH i LDS-a, predsjednik Općinske izborne komisije imat će nadoknadu od 400 KM, dok će članovi sve četiri godine primati po 350 KM.

Suficit u 2007. g. 1.286.000 KM

Na 42. sjednici Općinskog vijeća Srebrenik, usvojen je Izvještaj o izvršenju budžeta Općine Srebrenik za 2007. godinu, gdje je ostvaren suficit od blizu 1.286.000 KM, i isti je prenesen u budžet Općine Srebrenik za 2008. godinu, kao neraspoređeni višak prihoda. Potvrđena je i prosječna konačna građevinska cijena kvadratnog metra korisne stambene površine, koja je ostala kao i prošle godine u iznosu od 950 KM. Vijećnici su usvojili i Urbanistički projekat nove zgrade općinske administracije. Usvojen je i prijedlog odluke o pristupanju izradi izmjena i dopuna prostornog plana, gdje je poseban akcenat postavljen na neplansku izgradnju vikendica na Majevidi, koja se hitno mora zaustaviti, s obzirom da je na ovome dijelu planirana izgradnja Sportsko-rekreativnog centra. Načelniku Općine Srebrenik dozvoljeno je da namiri razliku od blizu 100.000 KM izvođačima infrastrukturnih projekata koje su tražili, s obzirom da je u međuvremenu došlo do porasta cijena materijala, uz naglasak da se izvođačima ograniči početak radova i to 20 dana od potpisivanja ugovora. Vijećnici su usvojili i Odluku o zabrani saobraćaja u ulici Alije Izetbegovića, s obzirom da bi uskoro trebala početi izgradnja pješačke zone. Usvojen je i urbanistički projekat «Zanatskog centra I» u ulici Alije Izetbegovića i «Zlatnih ljiljana», kojim će zanatski centar dobiti moderan izgled, kao i izvještaj o radu općinskog načelnika, općinskih službi te općinskog pravobranioca za prošlu godinu. S obzirom da je nakon sugestije Centralne izborne komisije BiH ostalo upražnjeno mjesto jednog člana Općinske izborne komisije, tako je ovo mjesto pripalo Mirsadi Mahmutović, diplomiranoj pravnici koja je na Birou za zapošljavanje, a koja radi kao volonter u Općinskom sudu Gradačac. Ona je zadovoljila kriterije jer je ženskog spola te se izjasnila kao Bosanka, što spada u red ostalih naroda.



Sa 42.sjednice OV: Suficit od 1.286.000 KM

SARADNJA I POSJETE

Premijer FBiH Nedžad Branković posjetio Općinu Srebrenik



Vlada FBiH pomagal će razvoj općine Srebrenik

Načelnik Općine Srebrenik Osman Suljagić ugostio je premijera Vlade FBiH, Nedžada Brankovića, pri čemu je prvi čovjek Vlade FBiH upoznat sa završetkom druge faze Deponije otpada u naselju Babunovići, koji će Vlada FBiH potpomoci, kako bi se riješio ovaj vrlo značajan projekat. Premijer je upoznat i o regulaciji korita rijeke Tinje, kako se više ne bi dešavale velike poplave u ovome gradu, kao i o projektu izgradnje nove zgrade Gimnazije, s obzirom da su učenici ove škole smješteni u Mješovitoj srednjoj školi u Srebreniku. –Zahvaljujem se premijeru Nedžadu Brankoviću na dosadašnjoj podršci našoj Općini, a iskreno se nadam da nećemo biti zaboravljeni ni kada su u pitanju ostala kapitalna ulaganja na našem općinskom području. S obzirom da se na našem općinskom području rade projekti koji su od kantonalnog, federalnog i državnog značaja, tako i očekujemo dodatna sufinansiranja sa viših nivoa vlasti, kazao je načelnik Općine Srebrenik, Osman Suljagić. Premijer Vlade FBiH Nedžad Branković je naglasio «da su svi dosadašnji zajednički projekti Općine Srebrenik i Vlade FBiH uspješno okončani, te se iskreno nada da će i ovi koje je kandidirala Općina Srebrenik za 2008. godinu, također biti realizirani, s obzirom da je načelnik Općine Srebrenik, Osman Suljagić, znao prepoznati šta je to što je potrebno građanima». Izuzev premijera Brankovića i ministara iz Vlade FBiH u ovoj posjeti Općini Srebrenik bili su još predsjedavajući Parlamentarne Skupštine BiH, Safet Softić te premijer Vlade Tuzlanskog kantona, Enes Mujić.

Vlada TK će sufinansirati infrastrukturne projekte

Općinu Srebrenik posjetio je premijer Vlade TK Enes Mujić sa ministrom za finansije, Seadom Bećirevićem, ministrom za socijalni rad Farukom Vikalom te ministrom za industriju, energetiku i rudarstvo Sehadinom Ograševićem. Razlog ove posjete je razgovor u vezi pomoći Vlade TK kada su u pitanju infrastrukturni projekti.

SUFINANSIRANJE OD BLIZU MILION KM

-Premijer i ministri Vlade TK su obećali da će podržati infrastrukturne projekte u ovoj godini, a to je završetak Fiskulturne dvorane kod Druge osnovne škole za šta je potrebno oko 500.000 KM, zatim završetak deponije otpada u Babunovićima sa blizu 300.000 KM, zatim izgradnju lokalnih vodovoda, filterskih postrojenja i kanizacionih krakova sa blizu 70.000 KM. Također, tražili smo i da se pomognu projekti pokretanja jedne savremene hladnjače kao i klaonice, koja bi bila od kantonalnog značaja, kaže načelnik Općine Srebrenik Osman Suljagić.

Kada je u pitanju podrška Vlade TK za infrastrukturne projekte u Srebreniku, kao i podrška privrednim kolektivima, premijer Enes Mujić je kazao: -Ovo je bila prilika i da posjetimo nekoliko privrednih subjekata, gdje je pokazano da je proizvodnja u porastu na ovom općinskom području. Kod podsticaja situacija je jasna. Sredstva su nepovratna i dobit će ih oni koji žele da



Premijer je bio oduševljen pogonima firme «Herceg» investiraju vlastita sredstva, ali i da zapošljavaju. Isključivi kriteriji bit će zapošljavanje novih radnika, a prije svega mladih i obrazovanih kadrova. Ministarstvo prati izvršenje ovih projekata i potpuno sam uvjeren da će ova sredstva biti na pravi način plasirana. U okviru ove posjete Srebrenik, premijer Vlade TK, Enes Mujić, je posjetio zajedno sa ministrima i preduzeća «Herceg» i «Venera», gdje su ih predstavnici ovih kompanija upoznali sa svojim potencijalima.

Uspostavljanje privredne saradnje sa firmama iz Vlasenice



Delegacija iz Srebrenika u Općini Vlasenica

Predstavnici izvršne i zakonodavne vlasti iz Srebrenika, sa privrednicima sa ovog općinskog područja, posjetili su 28.03.2008.godine Općinu Vlasenica, u cilju uspostavljanja što bolje saradnje između ove dvije općine. U delegaciji iz Srebrenika bili su načelnik Osman Suljagić, savjetnik za ekonomska pitanja Mehmed Bajrektarević, šefovi općinskih službi, predstavnici preduzeća «Herceg», «Fana», «Metalac», «Gromeks»..., te predsjednik «Srpskog građanskog vijeća» Srebrenik Milorad Blagić.

Ponude «Hercega», «Fane», «Metalca», «Gromexa»

Tako su iz «Hercega» ponudili konkretnu saradnju sa vlaseničkom kompanijom «Alpro», koja se također bavi proizvodnjom pvc stolarije, a iz «Fane» su predložili otkup voća i povrća sa vlaseničke općine. Predstavnik «Metalca» Hasib Bijelić ponudio je otkup ljekovitog bilja, dok je vlasnik «Gromexa» Hazim Muratović ponudio saradnju u izgradnji stambeno-poslovnih objekata.

Goste iz Srebrenika primili su načelnik Vlasenice Dragomir Strupar, predsjednik Skupštine Sakib Zubović, njegov zamjenik Mićo Kurtuma, te savjetnik Ministra za izbjegla i raseljena lica Vlade FBiH, Mujo Hadžiomerović. Na ovome sastanku načelnik Općine Srebrenik Osman Suljagić istakao je «da će ova posjeta biti iskorištena prevashodno da se povežu privredni subjekti ovih općina, s obzirom da je privreda na području općine Vlasenica relativno nerazvijena te da postoji obostrani interes da se razni vidovi saradnje uspostave». Delegacija iz Srebrenika posjetila je i mjesto na kojem su započeti radovi na izgradnji Memorijalnog centra na kojem će biti obilježeno mjesto gdje je 2.500 Bošnjaka sa ovog općinskog područja izgubilo život.

Švedani oduševljeni boravkom u Srebreniku

Predstavnici švedskog Fudbalskog kluba Angebeck iz Degerforsha, bili su u sedmodnevnoj posjeti Srebreniku. Dvadesetočlana ekipa iz Švedske koja je do našeg grada putovala više od 2.500 km, tokom boravka u Srebreniku odigrala je na Gradskom stadionu prijateljski meč sa nogometašima Gradine.



Švedane su bili oduševljeni boravkom u Srebreniku

U okviru ove posjete Švedani su posjetili Stari grad «Gradinu» u Gornjem Srebreniku, zatim izletišta «Orion», kao i nekoliko preduzeća na području općine Srebrenik. Dolazak u BiH, Skandinavci su iskoristili i za odlazak na fudbalsku prijateljsku utakmicu u Zenici između «A» reprezentacija BiH i Makedonije. Gosti iz Švedske boravili su u motelu «Gradina», gdje ih je primio načelnik Općine Srebrenik, Osman Suljagić, kojem su predstavnici F.C. Angebecka uručili prigodne poklone. Predstavnik i predsjednik ovoga kluba je Bosanac, Reuf Jahić, koji je rođen u Ježincu kod Srebrenika, a koji već nekoliko godina živi i radi u ovoj skandinavskoj zemlji. Uzvratna posjeta predstavnika Gradine i Općine Srebrenik, predviđena je za juli ove godine.



Švedani su načelniku poklonili dres FC. Angebecka

INFRASTRUKTURA

Zanatski centar u novom ruhu ?

"Zanatski centar I". Ovim projektom su obuhvaćeni objekti i zemljište katastarskih parcela 890/2-23 k.o. Srebrenik grad, odnosno, dio objekata Zanatskog centra I, u ulici Alije Izetbegovića i Zlatnih ljiljana, uključujući dio zemljišta ispred istih objekata. Grafički izvodi iz navedenog Urbanističkog projekta su bili



Idejno rješenje fasade Zanatskog centra I

U narednom periodu trebalo bi doći do dogradnje «Zanatskog centra I» u centru Srebrenika u ulici Alije Izetbegovića. Idejnim rješenjem predviđa se dogradnja, čime bi se trebale dobiti stotine novih

izloženi na oglasnom panou Doma kulture u ulici Alije Izetbegovića, te u prostorijama Službe za prostorno uređenje, stambeno-komunalne poslove i obnovu općine Srebrenik, u ulici 211. oslobođilačke brigade u Srebreniku, gdje se i mogao izvršiti uvid u iste svakim radnim danom od 7,30 do 16 sati. Do navedenog



Današnji Tržni centar je zastario

kvadratnih metara poslovnih prostora te moderna fasada, koja bi trebala doprinijeti znatno ljepšem izgledu grada. Svakome vlasniku poslovnog prostora dozvoljeno je da doizgradi s prednje strane po dva metra prema ulici, tj. budućem šetalištu, dok će vlasnici ovih objekata imati mogućnost da nadzidaju i po jedan sprat. Do sredine aprila 2008. godine trajala je javna rasprava po nacrtu Urbanističkog projekta

datuma svi zainteresovani su mogli u pisanom obliku dostaviti svoje eventualne primjedbe, sugestije i prijedloge, kako bi mogli doprinijeti što kvalitetnijem konačnom prijedlogu predmetnog urbanističkog projekta, u Službu za prostorno uređenje, stambeno-komunalne poslove i obnovu. Završna rasprava po predmetnim nacrtima je održana dana 18.04.2008. godine u Plavoj sali Doma kulture u Srebreniku.

Čehaje dobivaju novu džamiju



Nova džamija u Čehajama

Džemat Čehaje MIZ-Srebrenik gradi džamiju u vrijednosti 500.000 KM. Džamija ima jednu veliku kupolu i osam manjih potkupola, a planirana je munara visine 50 metara. Džemat Čehaje je prigradsko naselje Srebrenika, ima više od 300 domaćinstava sa blizu 1.000 stanovnika i smješten je na blagim brežuljcima oko doline rijeke Tinje. U džematu imamsko-hatibsku i muallimsku dužnost trenutno obavlja mladi imam Jasmin ef. Begunić. Prva džamija u Čehajama je sagrađena 1890 god., i istu je zub vremena znatno oštetio, pa su vrijedne džematlije iz Čehaja, 1958. godine, istu u potpunosti renovirali i temeljito obnovili. Svečano otvorenje džamije bilo je 17. oktobra 1958. god. Devedesetih godina javlja se ideja za gradnju

Husejn Avdić donirao 70.000 KM

U toku su završni radovi na kupolama koje se oblažu bakrom, izvedeni su grubi radovi na elektroinstalacijama a teku pripreme i oko početka gradnje munare visine oko 50 metara, za koju se javio donator biznismen iz Čehaja Avdić (Abdulkadira) Bego. Dosadašnja ulaganja u gradnju džamije iznose 330.000 KM, a do njenog potpunog završetka potrebno je još oko 170.000 KM. Najveći donator je Begin brat Avdić (Abdulkadira) Husejn iz Čehaja koji je dosada donirao 70.000 KM.

nove i veće džamije u Čehajama, jer postojeća, dimenzija 10x7,5m, nije mogla zadovoljiti potrebe velikog broj džematlija. Međutim agresija na našu domovinu zaustavila je sve aktivnosti oko ove izgradnje, a većina džematlija se uključuje u redove Armije BiH, gdje na žalost sedmorica njih daju svoje živote. Po završetku agresije kod džematlija se javlja

javlja ideja za gradnju nove džamije. Plac površine 1.100 m², koji se nalazi uz magistralni put Tuzla–Orašje i 1km od grada Srebrenika, kupljen je 1998. godine za 30.000 KM. Gradnja džamije dimenzija 26 x 16 m je započela 2001. god. U toj godini je urađen suteran koji sadrži mektebsku učionicu, abdesthanu, mokri čvor i gasulhanu, kao i prostor za biblioteku i slobodne aktivnosti polaznika mektebske nastave. Nakon toga uslijedio je zastoj do 2006. godine, kada se u junu ponovo pokreće akcija oko gradnje džamije. Ovom prilikom džemat Čehaje se zahvaljuje svima koji su svojim dobrovoljnim priložima pomogli gradnju ove džamije. Početkom mjeseca juna džematlije Čehaja planiraju organizirati «Šljemensku dovu» na kojoj očekuju prisustvo velikog broja vjernika. Džematlije Čehaja se nadaju da će, ako Bog da, u ljeto 2009. godine i svečano otvoriti svoju džamiju za koju mnogi već kažu da je «čehajska ljepotica».

Za fasadu na Domu zdravlja Srebrenik 96.000 KM

Nakon što su izvršili temeljitu rekonstrukciju i dogradnju dviju lamela, objekta Hitne pomoći i ordinacija porodične medicine u sklopu postojećeg Doma zdravlja Srebrenik, menadžment ove ustanove je pokrenuo aktivnosti i na izradi savremene fasade na



Otpočeli radovi na izgradnji fasade na Domu zdravlja kompletnom objektu. Nakon završetka procedure odabira najpovoljnijeg izvođača radova, 8. aprila su započeli radovi na postavljanju savremene fasade (stiropor 8cm, masa za lijepljenje i izravnjavanje, te nanošenje fasadne boje po izboru projektanta) na kompletnom objektu. Ugovorena vrijednost kompletnog posla je oko 96.000 KM, a isti, osim izrade fasade podrazumijeva i izradu nadstrešnica ispred ulaza u pojedine lamele, te izmjenu stolarije na nekoliko pozicija. Radove izvodi ZD «Osma» iz Tinje Donje, a za oko dva mjeseca se predviđa završetak svih radova, ističe dipl. ing. građ. Selimović Samid, nadzor nad izvođenjem građevinskih radova.

NOVA RADNA MJESTA

"ITA-WOOLF" sagradila moderan objekat



Novi poslovni objekat «ITA-Woolf»

Austrijsko-bosanska kompanija «Ita-Woolf», koju njen prvi čovjek za područje BiH Bego Avdić, naziva «sestrinskim» firmama, nedavno je u Čehajama, prigradskom naselju Srebrenika, otvorila moderni tržišni objekat, koji se nalazi neposredno pored magistralnog puta Tuzla-Orašje. Osnovna djelatnost ove kompanije je prodaja obuće, po čemu su nadaleko poznati, a uskoro se planira i proizvodnja obuće u pogonu u Čehajama, koja bi se izvozila i na evropsko tržište. – «Ita-Woolf» je firma koja ima trenutno desetak uposlenih, a svakako da ćemo otvaranjem ovog novog i modernog objekta, te razvojem pogona proizvodnje obuće uposliti još radnika. Mi smo u zadnjih nekoliko godina postojanja na našem tržištu prisvojili kupce najboljim odnosom kvalitete i cijene na tržištu, tako da nam je to najbolja reklama, kaže Avdić, koji je još za vrijeme bivše Jugoslavije, dok je radio u Doboju, bio nadaleko poznat kao uspješan poslovni čovjek. Novi tržišni objekat u Čehajama prostire se na blizu 1.000 kvadratnih metara i čine ga prizemlje i dvije etaže.



Otvorena poslovница "Nove banke" u Srebreniku

U prisustvu brojnih gostiju, početkom marta u Srebreniku je otvorena poslovница «Nove Banke» a.d. Banja Luka, u kojoj naši građani mogu dobiti gotovo sve vrste bankarskih usluga. Banku je otvorio općinski načelnik Osman Suljagić, koji je istakao da je ovo «sedma po redu banka koja se otvara u Srebreniku, ali da Srebrenik raspolaže, kako sa društvenim tako i privrednim potencijalima, tako da sve one, pa i novootvorena banka, mogu uspješno poslovati». Na kraju obraćanja općinski načelnik je Svjetlanu Bešiću, rukovodiocu poslovnice «Nove Banke» u Srebreniku zaželio uspješan rad.



Svjetlan Bešić: Rukovodilac poslovnice

Agencija Srebrenik je četvrta poslovница koja posluje u okviru Filijale Tuzla i nalazi se u Ulici Maršala Tita b.b., u Centru Srebrenika, preko puta Gradskog parka. Na stotinu kvadratnih metara korisne površine, sa četiri zaposlena radnika i vlastitim parking prostorom, «Nova Banka» omogućava svojim klijentima profesionalno korištenje zahtijevanih usluga. Radno vrijeme Agencije Srebrenik radnim danom je od 8 do 16 sati, a subotom od 8 do 13 sati. Osim ove poslovnice, u budućem razdoblju, «Nova Banka» planira dalje proširenje poslovne mreže, a za sada na području čitave BiH ima 44 bankomata, i zapošljava 477 radnika, 100 radnika više nego 2006.godine, na ukupno 12 filijala i 66 ostalih organizacionih jedinica, što govori o dinamičnom razvoju banke, koja je posljednjih godina među najuspješnijim u BiH.

"Winform" u Špionici proizvodi staklo i pvc stolariju



Halil Halichi: Vlasnik firme

Nedavno je u Špionici kod Srebrenika otvorena nova fabrika PVC stolarije i stakla «Winform», koja je na ovo općinsko područje stigla posredstvom tursko-bosanske poslovne saradnje. Prilika je to za otvaranje najmanje 50 novih radnih mjesta, a također posebno je važno što će se proizvodi iz ove fabrike izvoziti u Hrvatsku, Srbiju, Sloveniju, Makedoniju, Tursku, Njemačku... - Naš mjesečni cilj je proizvodnja 100.000 kvadratnih metara PVC stolarije. Profili su proizvedeni prema visokim evropskim standardima, tako da ćemo gotove proizvode izvoziti u nekoliko evropskih država, kako u okruženju tako i širom Evrope, kaže Halil Halichi, vlasnik ove firme. Ono što je novo na našem tržištu jeste i proizvodnja vanjske PVC fasade, koja je po riječima menadžmenta ove firme, nešto novo na ovim prostorima. -Ova Winform siding fasada pridonosi novom i zdravijem imidžu okoline, gdje ova fasada pruža i do 45% više termo-izolacije uz garanciju do 50 godina, bez ikakve potrebe za dodatnim farbanjem i zaštitom, pojašnjava Bilal Karliga, direktor «Winforma».



Proizvodnja stakla i pvc stolarije

Privatizacija "Interpleta" uspješno okončana

Radnici Tvornice trikotažne konfekcije «Interplet» Srebrenik, 16. februara 2008.godine, u prostorijama motela «Gradina», na izuzetno svečan način, su proslavili uspješan završetak privatizacije ovog, nekad uzornog, privrednog kolektiva.

ZAHVALNOST NA VELIKOM ANGAŽMANU

Predstavnik sindikata Ismet Nurkanović je izrazio zahvalnost načelniku Općine Srebrenik Osmanu Suljagiću, ministru industrije i energetike u Vladi TK-a Saudinu Ogrješeviću, ministru za rad i socijalnu politiku u Vladi TK-a Faruku Vikalo, savjetniku premijera Vlade TK-a Mustafi Burgiću, direktoru Zavoda PIO TK-a Zekiru Salihoviću, direktoru JU Služba za zapošljavanje TK-a Šemsi Berbiću, likvidacionom upravniku i bivšem direktoru preduzeća «Interplet» Srebrenik, Mensuru Muharemoviću te komercijalnom direktoru firme «Sinbra» Sulejmanu Dediću, na pruženoj pomoći na okončanju, kako su istakli, golgote, kroz koju su prolazili u proteklih deset godina.




Nakon godina agonije, sve se završilo uz pjesmu

Zahvaljujući njihovom angažovanju, rečeno je na svečanosti, imovina «Interpleta» prodana je Halilu Sinanoviću, vlasniku firme «Sinbra» iz Tuzle, koji je izmirio sve preuzete obaveze prema radnicima i fondovima. Time su se stekli uslovi da 20 starijih radnika konačno ode u zasluženu penziju, a preostalih oko 130 radnika da posredstvom Biroa za zapošljavanje ostvari prava po osnovu socijalne i zdravstvene zaštite. Nakon obraćanja predstavnika Sindikalnog odbora i institucija koje su svojim angažovanjem omogućile privatizaciju «Interpleta», upriličeno je zajedničko druženje koje je uz muziku uživo i velik izbor jela i pića potrajalo do duboko u noć.

DANI POVELJE

Srebrenik proslavio 675. rođendan Grada

U Srebreniku je i ove godine od 14-17. februara, održana već tradicionalna kulturna manifestacija «Dani povelje», kojom je obilježen 675. rođendan Grada Srebrenika. Manifestacija se obilježava u povodu Povelje kojom je bosanski ban Stjepan II Kotromanić 15. februara 1333. godine Dubrovačkoj republici ustupio Rat, Ston, Prevlaku i otoke oko Rata. Stari Grad



Srebrenik 1333-2008

Srebrenik, poznat kao «Gradina», trebao bi u skorije vrijeme da postane prepoznatljiv turistički proizvod, koji će zasigurno pokrenuti i ostale potencijale. Stari Grad je simbol Srebrenika, a nema sumnje da će nakon njegove potpune restauracije postati pravi turistički centar, ne samo Srebrenika, nego Tuzlanskog kantona pa i cijele BiH. Vlasnici Grada Srebrenika su bili banovi i kraljevi srednjovjekovne bosanske države iz dinastije Kotromanića. Na njih podsjećaju i toponimi Banjske




Slikari amateri su imali priliku pokazati svoja djela Njive (iznad Donje Špionice), Kraljevac (iznad Grada Srebrenika), Kraljevci (između Donjeg i Gornjeg Ljenobuda, voda Kraljica (između Gornjih i Donjih Moranjaka)... Stari srednjovjekovni Grad iz XIII/IV stoljeća, Turci su odmah po osvajanju oko 1520. godine, pretvorili u svoju utvrdu. U nju su smjestili vojnu posadu na čelu sa zapovjednicima. U povodu 675. rođendana Grada Srebrenika, prof. Sadil Mehmedović



Sa predstave «Kralju, ipak ne sviđa se gluma»

u ulozi urednika objavio je godišnji list «Ševak», koji detaljnije govori o nastanku Srebrenika. «Dani povelje» otvoreni su izložbom slika amatera, zatim promocijom romana «Sutra je novi dan», srebreničkog autora Fadila Duranovića, pozorišnom predstavom «Kralju, ipak ne sviđa se gluma» u režiji Lajla Kaičkija, dok su «Dani povelje» zatvoreni muzičko-scenskim programom u povodu rođenja Grada, gdje su učenici MSS Srebrenik, koji su članovi «Umjetničke radionice», izveli zanimljivu predstavu.




List «Ševak» posvećen je rođenju Grada Srebrenika



Promociju romana je otvorio načelnik Općine Srebrenik, Osman Suljagić

U okviru manifestacije «Dani povelje» Srebrenik 2008. godine, u četvrtak 14. februara je u skoro ispunjenoj kino-sali srebreničkog Doma kulture, održana promocija romana „Sutra je novi dan“, srebreničkog autora Fadila Duranovića. Riječ je o romanu-prvijencu ovog Srebreničanina, i to samo godinu dana nakon što je izdao prvu zbirku pjesama „Živim tiho“. Promotori knjige bili su profesori Zejčir Hasić i Jasna Hadžiselimović, izdavač je «Bosanska riječ» Tuzla, a značajnu pomoć u realizaciji projekta pružila je i Općina Srebrenik. -U romanu „Sutra je novi dan“ autor gradi tipologiju likova i sudbina, gradi vlastiti svijet, gdje svaka pojava ima svoje mjesto, riječi su promotorke Jasne Hadžiselimović. Sam autor ovog zanimljivog romana o ljubavi i ratu zahvalio se svojoj porodici, prijateljima, sugrađanima, saborcima, kao i pokrovitelju knjige općinskom načelniku Osmanu Suljagiću, rekavši kako je izdavanjem ovog romana ispunio svoj veliki san.

Svečanim otvaranjem izložbe slikara amatera, u četvrtak 14. februara, u Srebreniku je zvanično počela



Tea Mujčić iz Tuzle predstavila je sliku pokojnog makedonskog pjevača, Toše Proeskog

manifestacija „Dani povelje“. Izložba slika amatera upriličena je u holu Doma kulture u Srebreniku, a radove je izložilo petero likovnih umjetnika-amatera i to: Suada Odobašić, Selma Šiljić, Sulejman Fazlić, Zehrina Fazlić i Tea Mujčić. Ovu izuzetno dobro posjećenu izložbu svečano je otvorio predsjedavajući Općinskog vijeća Srebrenik prim. dr. Ibrahim Zukić, a prigodnim riječima se obratio i prof. Atif Kujundžić. Posebnu pažnju, naročito mladih posjetitelja, privukla je Tea Mujčić, sedamnaestogodišnja učenica Gimnazije Meša Selimović Tuzla, sa zanimljivim portretom nedavno poginulog makedonskog pjevača Tošeta Proeskog.



Amateri su predstavili zanimljiva slikarska djela

Glumci «Bosanskog narodnog pozorišta Zenica» izveli su zanimljivu predstavu "Kralju, ipak ne sviđa se gluma", po tekstu književnika Dževada Karahasana, a u režiji Lajle Kaičkije. To je priča o



Glumci iz Zenice izveli su zanimljivu predstavu osnovnim pitanjima čovjekove egzistencije, smještena u bajkovitom svijetu kraljeva, dvorskih luda, vojskovođa i bludnica. Uloge su ostvarili Haris Burina, Robert Krajnović, Tarik Marković, Dženita Imamović, Uranela Agić, Nakib Abdagić, Nusmir Muharemović i Selma Alijagić, a predstavu je gledalo više od dvije stotine ljubitelja pozorišne umjetnosti u Srebreniku.

HRONIKA

Bruceloza-tema vanredne sjednice štaba CZ Srebrenik

Na području općine Srebrenik do sada je registrovano 100 ovaca koje su zaražene brucelozom, kazao je na vanrednom sastanku štaba Civilne zaštite Općine Srebrenik, Edi Suljkanović, dr. vet. medicine u Veterinarskoj stanici Srebrenik. Prošle godine na ovom općinskom području kontrolisano je 2.200 ovaca, iz stada gdje je do sada bilo pozitivnih grla na brucelozu, a za oko 100 grla je stigao nalaz iz



Sa vanredne sjednice Štaba CZ Srebrenik

Sarajeva da su pozitivna grla. Zbog ovakve situacije 9.marta je održana vanredna sjednica štaba Civilne zaštite kako bi se preduzele mjere u suzbijanju ove bolesti, te se postupilo sa zaključcima Vlade TK o ovoj bolesti. JU «Dom zdravlja» i JP «Veterinarska stanica» će izraditi propagandni materijal koji će se u obliku letaka dijeliti građanima, a također, organizovat će se i emisije na lokalnim medijima, kako bi se stanovnici upoznali o ovoj bolesti, imajući u vidu skorašnje prvomajske praznike i potencijalne opasnosti koje prijete od neprovjerenog mesa. Član štaba CZ, ljekar

Liječenje od bruceloze je skupo i dugo
-Liječenje od bruceloze traje 2-3 mjeseca, i ono je komplikovano i skupo, a simptomi bolesti su dosta slični gripu. Dakle, pojavljuje se povišena temperatura i groznica, a trajne posljedice ostaju na srcu, bubrezima, a može izazvati i sterilitet i kod muškaraca i kod žena, kaže dr. Harčinović Ešref.

Doma zdravlja Srebrenik, Ešref Harčinović, kazao je da je do sada bilo i oboljelih ljudi a karakterističan je slučaj u naselju Potpeć gdje je četveročlana porodica oboljela od bruceloze. Na sjednici je utvrđen i prijedlog lokacije nove grobnice za životinje koja bi trebala biti na površini od blizu 500 m² i isti će biti upućen OV-u

na usvajanje već na narednoj sjednici. Riječ je o državnom zemljištu, koje se nalazi izvan naselja, a u slučaju prihvatanja iste, za njenu izgradnju dio sredstava bi obezbijedila i Vlada TK. Donesena je i Odluka o zabrani prometa stoke na svim legalnim i ilegalnim pijacama, uz konstataciju da se Kantonalna veterinarska inspekcija aktivnije uključi u realizaciju Odluke. Zadužena je Služba CZ da u saradnji sa Veterinarskom stanicom Srebrenik sačini Izvještaj o stanju bruceloze na našem općinskom području kao i Prijedlog mjera za suzbijanje iste za narednu sjednicu OV-a..

Održan četvrti "Teatar fest"

U organizaciji Alternativnog teatra Srebrenik, od 1. do 8. aprila 2008.godine, u srebreničkom Domu kulture održan je četvrti „Teatar fest“, na kojem su učešće uzele četiri pozorišne grupe. Nakon prigodnog kulturno-umjetničkog programa članova folklorne i



Folklorna sekcija Alternativnog teatra Srebrenik

muzičke sekcije Alternativnog teatra Srebrenik, srebrenički „Teatar fest“ su otvorili članovi Alternativnog teatra Srebrenik komedijom „Ko je državni lopov“. U nastavku festivala srebreničkoj publici su se 04.04.2008.godine predstavili članovi pozorišta «Neretva» iz Konjica sa predstavom «Moj život u koferu», a narednog dana održana je pozorišna predstava «Orkestar Titanik» u izvedbi teatra «Total» iz Visokog. Dana 07.04.2008.godine održana je pozorišna predstava «Zašto?» Pozorišta mladih Tuzla, dok je na



Sa predstave «Ko je državni lopov»

zatvaranju „Teatar festa“ dana 08.04.2008.godine upriličena pozorišna predstava za djecu „Čarobnjak iz Oza“ u izvedbi Alternativnog teatra Srebrenik. Obzirom na dobru organizaciju i relativno veliko zanimanje građana, festival je opravdao očekivanja.

ŽIVOT

Na Majevidi planinari iz Osijeka i Orašja



Sa pohoda na Majevidu

Planinarsko društvo «Majevidica» Srebrenik, potkraj marta je organizovalo još jedan pohod na planinu Majevidu, a po prvi put srebrenički planinari imali su i goste, i to ljubitelje prirode i planinarenja iz Osijeka i Orašja. - Imali smo blizu 120 učesnika i prešli smo jednu prelijepu trasu od SRC «Orion» do kote «Lipici», sa 140 do 743 metra nadmorske visine. Posebno je bitno naglasiti i da je na ovom pohodu učestvovalo i dosta djece i omladine, riječi su Mustafe Buljubašića - Tarasa, predsjednika PD «Majevidica» Srebrenik. Ljubitelje prirode i planine poslužilo je izuzetno lijepo vrijeme, a nakon četiri sata uspinjanja, na mjestu budućeg Planinarskog doma na Lipicima, uslijedio je odmor uz čaj, kao i logorski grah za sve učesnike. Nešto kasnije planinari su posjetili i simbol Srebrenika, tvrđavu «Stari Grad». Gosti iz planinarskih društava «Bršljan»-Jankovac i «Čičak»-Orašje nisu krili zadovoljstvo, pohvalili su gostoljubivost domaćina rekavši da su dojmovi prelijepi i da će još dugo pamtiti ovaj događaj.



Ljekarski pregledi za povratnike u Potpeć

Početkom aprila Crveni krst TK je organizovao ljekarske preglede i podjelu besplatnih lijekova za povratnike u MZ Potpeć u blizini Srebrenika. Ljekarski tim je izvršio preglede oko pedesetak povratnika, na čije je zahtjeve obavljena i kontrola šećera u krvi i mjerenje krvnog pritiska. Rukovodstvo ove mjesne zajednice je obezbijedilo i besplatan prijevoz za nepokretne i teško bolesne osobe.



Pregledano je oko 50 građana

Crveni krst TK akciju je izveo u koordinaciji sa Klinikom za plućne bolesti TK, Domom zdravlja Srebrenik i Udruženjem "Snaga žene" iz Tuzle. Prema riječima dr. Branke Antić-Štauber, predstavnice Udruženja, «ovakve akcije se organizuju već šest godina u povratničkim naseljima širom naše zemlje, a dvaput mjesečno posjećuju i povratnike na području Srebrenice. Osnovna ideja je pomoći povratnicima da se što lakše adaptiraju u svojim mjestima, u čemu im je redovan jednogodišnji ljekarski tretman, uz adekvatan psihološki pristup, svakako od velike pomoći.

Povratnicima u Srebrenik pomoć u poljoprivredi

U cilju stvaranja uslova za održiv ostanak povratnika srpske nacionalnosti, Općina Srebrenik je i ovog proljeća povratnicima osigurala besplatne pakete mineralnih đubriva i sjemenskog materijala. Za oko 70



Sa dodjele pomoći povratnicima povratničkih porodica u Potpeć, Jasenicu, Tinju i Špionicu krajem marta dopremljeno je 2.000 kilograma mineralnih đubriva, 120 kilograma luka, 1.600 kilograma sjemenskog krompira i 80 kilograma sjemenskog hibridnog kukuruza vrijednosti oko 6400 KM. Nakon što su povratnici srpske nacionalnosti iskazali svoje potrebe za određenim vrstama sjemena, zemljoradnička zadruga «Grin-produkt» iz Potpeća obavila je distribuciju paketa.

Hamzaliya proizvodi bio-rakiju

Hamzaliya Kešetović iz Srebrenika izumio je mašinu za proizvodnju odnosno destilaciju, kako on kaže, bio-rakije, koja je napravljena od prokroma, za razliku od klasičnih mašina koje se prave od bakra. – Ova rakija se peče na temperaturi od 100 stepeni celzijusa i na takvoj temperaturi se čuvaju vitamini i minerali. Kada se kiseli kom, izuzimaju se metil alkohol i ulja koja ostaju prilikom proizvodnje rakija u bakarnoj mašini. Novim načinom proizvodnje rakije, ušteda drveta odnosno pogonskog goriva je oko 60%, kaže Kešetović.



Kešetović pored svoje mašine

NACIONALNE MANJINE

Bolji status u društvu nacionalnim manjinama



Od sada nacionalne manjine sa boljim statusom

Nacionalne manjine na području općine Srebrenik trebale bi imati i svog predstavnika u Općinskom vijeću Srebrenika, obzirom da im je to novousvojenim Statutom i zagarantovano. U vezi sa ovim pitanjem, sredinom februara, u motelu «Gradina» u Srebreniku «Biro za ljudska prava» Tuzla, održao je radionicu pod nazivom «Učešće u vlasti predstavnika nacionalnih manjina», na kojoj su izuzev predstavnika ove organizacije bili prisutni i gotovo svi predstavnici nacionalnih manjina sa ovog općinskog područja, zatim predstavnici izvršne i zakonodavne vlasti u

IMAT ĆE SVOG PREDSTAVNIKA U OV

Simo Simić, predstavnik «Biroa za ljudska prava Tuzla», kazao je «da ova organizacija sa predstavnicima Općine Srebrenik, pokušava nacionalne manjine upoznati sa njihovim pravima, da učestvuju u izvršnoj i zakonodavnoj vlasti na narednim izborima i kako da u skladu sa izbornim zakonom, ostvare svoja prava. Da se upoznaju da imaju pravo na svog predstavnika u Općinskom vijeću tamo gdje su po popisu iz 1991. godine imali do 3% stanovništva, a gdje su imali više da imaju pravo na svoja dva predstavnika. I ono što je novina u tom zakonu za naredne izbore, jeste to da će na glasačkom listiću biti posebna mogućnost glasanja za predstavnika nacionalnih manjina pored drugih političkih stranaka. Dakle, imat će mogućnost da biraju svog predstavnika u općinsku vlast. Na taj način će se lakše izboriti za poboljšanje svog statusa u društvu.

Srebreniku, te poslanik u Federalnom parlamentu BiH Muhamed Moranjić.

Od 17 predstavnika nacionalnih manjina u BiH, najbrojnija je, ali i najugroženija romska populacija i to u svim segmentima. I dok se drugi bore za poboljšanje svojih uslova života, Romi se danas bore za elementarno pravo da prežive». Ovoj radionici prisustvovao je i Nedžad Jusić, predsjednik Udruženja Roma «Euro-Rom» iz Tuzle, koji je kazao: - Obzirom da se sve dešava na lokalnom nivou, zbog toga je vrlo važno njihovo uključivanje u rad zakonodavne vlasti na općinskom nivou, jer ipak mi moramo odlučivati sami o svojoj sudbini. Smatramo da će se novim izmjenama i dopunama izbornog zakona otvoriti mogućnost da nacionalne manjina ubuduće više učestvuju na narednim izborima, a samim tim bi se trebao i poboljšati status nacionalnih manjina, a pogotovo Roma.

Romi iz Špionice u ekološkoj akciji



Romi u ekološkoj akciji čišćenja okoline

Romi iz Špionice nedavno su okončali akciju čišćenja okoline. Desetak Roma predvođenih njihovim predsjednikom Fikretom Ahmetovićem, izašli su ispred svojih trošnih kuća, kako bi očistili smeće i zaraslo grmlje. Nakon što su očistili ovaj dio, Romi su prešli na čišćenje korita rijeke Tinje, koje je bilo zatrpano automobilskim gumama, pećima na čvrsto gorivo, plastikom, najlonima... Tokom ove akcije čišćenja kazali su da je «ovo samo početak ovakvih i sličnih akcija, te da će ubuduće više čistiti i paziti na okolinu». Njihov predstavnik Fikret Ahmetović, kazao je «da bi JKP «9.septembar» trebalo obezbijediti u ovom dijelu naselja barem jedan kontejner za odlaganje smeća, te da se nada kako će se uskoro dodatno sanirati oštećeni put pored njihovog naselja, koji vodi prema OŠ «Špionica».



Fikret Ahmetović

OBRAZOVANJE

Prikupljene knjige za biblioteku u Vlasenici



Enisa Muratović je dodijelila 40 knjiga

Na inicijativu «Društva za edukaciju i ekologiju –3 E» iz Tuzle i Asocijacije mladih SDA Srebrenik, na području općine Srebrenik okončana je akcija na prikupljanju knjiga za potrebe otvaranja nove biblioteke u Vlasenici, mjestu povratka prognanih Bošnjaka. –Cilj je bio do 31.marta 2008.godine pokušati prikupiti 5.000 komada knjiga, koliko je prema Pravilniku potrebno za osnivanje-otvaranje nove biblioteke, čime se stiču uslovi za obezbjeđenje finansiranja iz budžeta RS-a, te za otvaranje jednog do dva nova, prijeko potrebna, radna mjesta za naše povratnike. U tome smo i uspjeli, jer je prikupljeno preko potrebnih 5000 knjiga, a značajan doprinos u ostvarenju istog su imali naši građani i privredni kolektivi. Značajno je istaći dosta dobru pripremu akcije jer smo tražili i dobili pomoć od naših privrednih kolektiva za pomoć u realizaciji akcije, a putem lokal-

BROJNE DONACIJE KNJIGA

Predsjednik «Srpskog građanskog vijeća Srebrenik», Milorad Blagić i njegova supruga Ankica darovali su 15 a ljekari iz apoteke «Amara» Hidajeta i Nezir Ibrić 13 knjiga, dok je Enisa Muratović, komunalni inspektor u Općini Srebrenik, poklonila 40 knjiga iz svoje biblioteke. Ovom prilikom posebno ističemo primjer Ružice Elez-Lazarov, inače pjesnikinja iz Đakova, koja je akciju pomogla donacijom 100 primjeraka svoje poezije, kao i primjer velikih humanista Salima Hajderovca, Naide Merdanović i Arzije Bećiragić, koji su na području Zavidovića prikupili oko 1.300 knjiga.



Dodjela plakete humanistima iz Zavidovića

nih medija kao i plakata koje smo postavili na vidnim mjestima širom općine Srebrenik, kao i u svim školama na području naše Općine, obavijestili smo širu javnost, kako bi se u akciju prikupljanja knjiga kroz parolu: «Jedan učenik, jedna knjiga, poklon za učenike povratnike u Vlasenicu», uključio što veći broj učenika, njihovih roditelja i nastavnika-ističe pokrovitelj ove akcije općinski načelnik Osman Suljagić. Najveći aktivisti u ovoj akciji bili su učenici Prve osnovne škole Srebrenik, gdje je prikupljeno oko 1.000 naslova.

OŠ "Sladna" najbolja iz CIVITAS-a

Početkom aprila u Osnovnoj školi „Tinja“ održano je općinsko takmičenje učenika osnovnih škola sa područja općine Srebrenik iz Civitasa. Takmičenje su otvorili općinski kordinator civitasa Junuz Mulahmetović i direktor škole Tinja prof. Enis Dedić. Prvo mjesto su osvojili učenici OŠ “Sladna“, drugo mjesto učenici Prve osnovne škole Srebrenik, a treće mjesto su podijelili učenici Druge osnovne škole Srebrenik i OŠ „Duboki Potok“. Žiri je osim diploma, školama pobjednicama dodijelio i certifikate Civitasa za učenike škola koje su osvojile I, II i III mjesto, Certifikate za nastavnike voditelje Civitasa te certifikate Civitasa za:-Najbolju argumentaciju: Prva osnovna škola Srebrenik -Najboji portofolio: OŠ Špionica -Najbolji istraživački rad: OŠ Tinja -Najbolju dokumentaciju i prezentaciju: OŠ Sladna.



Direktor OŠ «Tinja» je otvorio takmičenje

ŠKOLSTVO

Poljoprivrednoj školi zemljište za praktičnu nastavu



MSŠ Srebrenik dobila je od Općine, da u naredne 4 godine, za potrebe Poljoprivredne škole, uz naknadu od 60 KM, koristi 9,1 duluma poljoprivrednog zemljišta, pored Gradskog stadiona. -Nastojanja obrazovnog sistema su da osposobi nosioce razvoja primarne poljoprivredne proizvodnje i da koristimo već postojeći potencijal. Da bi dali svoj doprinos razvoju agrara na naučnoj osnovi, formirana su odjeljenja za obrazovanje poljoprivrednih tehničara. Cilj nam je da polaznicima omogućimo sticanje i usvajanje znanja iz oblasti poljoprivredne proizvodnje, gdje bi se učenici osposobili da razumiju karakteristike i osobine intenzivne biljne proizvodnje, kaže direktor MSŠ, Safet Omerović. Na ovoj parceli vlastitim mikro-ogledima, učenici će imati priliku da spoznaju faktore za rast i razvoj biljaka i biljnih kultura, te da usvoje znanja o optimalnim rokovima, načinima i sistemima obrade zemljišta. U tom cilju se teži da se pripremi i osposobi centar učenja biljne proizvodnje pored stručno-teoretske nastave i edukacija proizvodnje.

Sajam omladinskog poduzetništva

U organizaciji BIP-a (Business Innovation Programs), a pod pokroviteljstvom Općine Srebrenik, 08.02.2008. godine, u dvorani srebreničkog Sportsko-rekreativnog centra, održan je Sajam omladinskog poduzetništva učenika srednjih škola iz Tuzle, Gradačca, Lukavca, Gračanice, Kalesije, Zvornika te grada domaćina. Na ovom takmičarskom sajmu učestvovalo je oko 300 takmičara iz 55 omladinskih preduzeća, koji su na svojim štandovima predstavili bogatu i zanimljivu ponudu proizvoda, poslovnih planova i usluga.



sajma omladinskog poduzetništva

boljeg proizvoda prvo mjesto pripalo je omladinskom preduzeću "Masiv" iz Srebrenika, najbolji biznis plan predstavili su učenici gimnazije Gradačac iz preduzeća "Beton", dok su najbolji štand, prema mišljenju stručne komisije, imali učenici MSŠ Gračanica iz firme "Magic". Sveukupno, prvo mjesto i nagradni ljetni kamp na moru osvojili su učenici ETŠC Tuzla iz firme "ID Softver", koji su prezentirali identifikacioni sistem za detekciju lica i osoblja, a čija je namjena rješavanje problema sa ulaskom stranih lica u školama i privatnim objektima.

Sajam je svečano otvorio predsjedavajući OV Srebrenik prim. dr. Ibrahim Zukić, a dobrodošlicu gostima i takmičarima poželio je i direktor MSŠ Srebrenik Safet Omerović. U kategoriji naj-

Sa

Jasmini Kavgić nagrada MUP-a TK

U sjedištu MUP TK-a, svečano su uručene osvojene nagrade učenicima koji su pobijedili na Konkursu koji je organizovan u povodu Dana policije MUP TK-a. Nagrade je uručio Ministar MUP TK-a, gosp. Sead Omerbegović, uz prisustvo većeg broja zvanica, među kojima su bili predstavnici Pedagoškog zavoda Tuzla, roditelji nagrađenih učenika i drugi gosti. Značajno je istaći da je na ovom natjecanju, drugim mjestom, nagrađen i rad učenice Jasmine Kavgić iz Druge Osnovne škole Srebrenik. Napominjemo da ovo nije prva nagrada učenicima Druge osnovne škole Srebrenik, jer su i na dosadašnjim natjecanjima osvajali nagrade.



Dobitnici nagrada sa ministrom Omerbegovićem

Javna tribina o maloljetničkoj delikvenciji

U prostorijama Druge osnovne škole Srebrenik, 11. marta 2008.godine, održana je javna tribina za učenike i njihove roditelje, posvećena prevenciji maloljetničke delikvencije. O sve izraženijem problemu delikventnog ponašanja mladih osoba, na tribini su govorili psiholozi i pedagozi, te predstavnici srebreničkog Centra za socijalni rad i Policijske stanice Srebrenik. Gosti tribine upozorili su na činjenicu da je najveći broj delikvenata uzrasta između 15 i 17 godina i da se njihova starosna dob sve više smanjuje. Većina njih, rečeno je na tribini, djeca su razvedenih roditelja, a velik broj maloljetnih delikventa dolazi i iz socijalno ugroženih i degradiranih porodica, koje se nisu uspjele snaći u procesu tranzicije. Učenicima i njihovim roditeljima prezentirane su i korisne informacije o prevenciji maloljetničke delikvencije i zakonskim sankcijama s kojima se mogu suočiti maloljetni delikventi, a imali su priliku postaviti i niz pitanja u vezi s problemom maloljetničke delikvencije.



Uticaj mass-medija na mlade

U srebreničkoj biblioteci, u organizaciji učenika i nastavnika Gimnazije iz Srebrenika, održan je okrugli sto na temu "Uticaj mass medija na mlade". Cilj ovog skupa, kako navode njegovi učesnici, nije borba protiv mass medija, nego zapravo uspostavljanje balansa u korištenju istih, a na temelju istinskih ljudskih vrijednosti i morala, navode jedni od moderatora ovog panela Bojana Stojanović i Adisa Džanić, učenice gimnazije u Srebreniku. Zloupotreba informacija sa interneta i korištenje njegovih sadržaja, do kojih se inače dolazi zdravijim putem, recimo putem knjige-vlastito je potkradanje. Knjiga kao najstariji medij pod uticajem novih-pada u krizu. Naša zadaća nije spašavati knjigu od interneta nego uspostaviti komplementarnu sinergiju pisane riječi u tvrdim koricama i interneta. Srebrenička biblioteka već radi na integraciji takvog jednog sistema, navodi direktorica biblioteke Fikreta Jašić. Škole svakako imaju bitan utjecaj na odgajanje mladih. Nastavnici bi trebali ponajviše da djecu uče istinskim vrijednostima i moralu-navodi profesor Sadil Mehmedović. Učenici apeluju na medije da svoje programske sadržaje usklade sa potrebama mladih. Mladi bi trebali medije sto više koristiti prije svega u obrazovne svrhe a više slobodnog vremena provoditi u društvu i stvaranju.

OŠ "Rapatnica" nova računarska oprema



Trenutak primopredaje

JU OŠ "Rapatnica" Srebrenik je bila jedan od učesnika na posljednjem takmičenju BH Telecoma pod motom "Sadimo naše šume". Akciju su izveli učenici VIII-ih razreda zajedno sa menadžmentom škole, grupom nastavnika i osobljem Šumskog gazdinstva "Majevica" Srebrenik. Zahvaljujući uspješnom nastupu ova škola je sada bogatija za 5 računara i 1 printer, što će im dodatno poboljšati uslove za kvalitetno odvijanje nastave informatike.

Najbolji fizičari iz Druge OŠ Srebrenik

U prostorijama Druge osnovne škole Srebrenik održano je završno općinsko takmičenje iz fizike učenika naših osnovnih škola. U konkurenciji učenika VII razreda najbolja je bila Zermira Delić iz OŠ «Duboki Potok», drugi je Kenan Kaltak iz Druge osnovne škole Srebrenik, dok je treći Mustafa Hrustić iz OŠ «Podorašje»



Najbolji fizičari

Među učenicima VIII razreda najuspješnija je bila Amila Mujezinović iz Druge OŠ Srebrenik, druga je Almerisa Džafić iz Prve OŠ Srebrenik, dok je treća Sabina Jusufović iz OŠ «Sladna». U ekipnoj konkurenciji u obje kategorije najbolja je Druge OŠ Srebrenik, dok je za najboljeg nastavnika proglašena Nermina Ivanek.

Smotra stvaralaštva OŠ

Kino sala Doma kulture bila je prepuna djece, roditelja i nastavnika na kulturno-umjetničkoj manifestaciji «Smotra stvaralaštva učenika OŠ Srebrenik 2007/2008». Srebrenički osnovci, priredili su vrlo sadržajan program u oblasti muzičkog, dramskog i likovnog stvaralaštva, s ciljem da se roditeljima i građanima prikaže sve ono najbolje što djeca i nastavnici pripreme u toku nastave i raznih sekcija. U kategoriji moderni ples, najbolji su bili osnovci iz OŠ «Špionica» i OŠ «Sladna», najbolji hor ponovo je bio iz «Druge osnovne škole», a najbolji folklorni nastup imali su OŠ «Duboki Potok» i OŠ «Rapatnica». Najbolji recital imala je OŠ «Špionica», najbolju dramu izvela je «Prva osnovna škola», koja je zajedno sa OŠ «Rapatnica» bila najuspješnija i u recitacijama. U likovnom stvaralaštvu najbolji su učenici iz OŠ «Sladna».

SPORT

Vehbija Husić ponovo na «kormilu» Gradine



Vehbija Husić

Upravni odbor Gradine, odlučio je da za šefa Stručnog štaba postavi Vehbiju Husića, trenera koji je u prošloj sezoni ostvario odličan rezultat sa Srebreničanima, kada su «Plavi» okončali sezonu na šestoj poziciji. Tako je nakon niza slabijih rezultata došlo do promjene na «kormilu» srebreničkog prvoligaša. U preostalim mečevima Vehbiji Husiću asistirat će Nermin Džanić, trener juniora koji će i dalje predvoditi ovu selekciju.

– Ja sam vojnik Gradine i spreman sam uložiti sav svoj trud i potencijal kako bi Gradina izborila opstanak. Smatram da ova ekipa ima potencijal i da možemo izboriti takmičenje u prvoligaškom društvu i naredne sezone, kaže povratnik na «kormilo» Gradine, Vehbija Husić. Nakon niza početnih slabih izdanja, «Plavi» su u prvih pet kola ostvarili svega jednu pobjedu, jedan remi i tri poraza, tako da je Gradini ozbiljno ugrožen prvoligaški status i slijedi teška borba za opstanak u ligi.

Za sport 155.000 KM

Na redovnoj godišnjoj Skupštini Sportskog saveza općine Srebrenik, na kojoj je uz dosta rasprave i negodovanja ipak usvojena predložena raspodjela novčanih sredstava od 155.000 KM, koju je predstavio Upravni odbor. Nezadovoljstvo su iskazali iz Košarkaškog kluba «Fenix», zatim iz Ribolovnog društva «Zeba», kao i iz Šahovskog kluba «Gradina», ali obzirom na ograničena sredstva, ovim članicama se nije moglo udovoljiti zahtjevima. Naglašeno je, da u odnosu na prethodne godine, kada se u Srebreniku izdvajalo za sport svega 50.000 KM dok se danas izdvaja iz budžeta tri puta više, dakle 155.000 KM, pokazatelj da izvršna i zakonodavna vlast Općine ipak razmišlja da što više ulaže u sport, kako bi se on izdigao na još veći nivo, jer se trenutno samo za sport izdvaja 3% od ukupnog budžeta. Pohvaljen je rad Košarkaškog kluba «Gradina» koji će se od naredne jeseni takmičiti u seniorskoj konkurenciji u A2 ligi FBiH, pa su i dobili više sredstava u ovoj godini, dok je istaknuto kako u Atletskom klubu je vrlo malo urađeno, tako da su oni dobili manje novca. Predstavnici Skupštine dali su saglasnost Upravnom odboru da se uradi Monografija sporta u Srebreniku, a također usvojen je i logo Sportskog saveza.

Košarkašice "Fenixa" nižu uspjehe



Košarkaški klub „Fenix“ Srebrenik osnovan je u februaru 2007. godine na inicijativu velikog broja roditelja i učenika, a članica je Sportskog saveza Općine Srebrenik, gdje u svom sastavu ima žensku pionirsku i kadetsku selekciju te mušku pionirsku selekciju. Za sada klub ima oko 60 članova raspoređenih u 6 grupa. – Treninzi se održavaju vikendom u Gradskoj dvorani, a svi ostali u

dvorani za tjelesni i zdravstveni odgoj u osnovnoj školi „Rapatnica“. Ženska kadetska selekcija se takmiči u Regionalnoj košarkaškoj ligi mladih u konkurenciji sa ekipama K.K. «Banovići», K.K. «Jedinstvo» Tuzla, K.K. «Živinice», K.K. «Brčko», K.K. «Iskra-As» Tuzla, i kadetskom selekcijom ekipe K.K. «Jedinstvo» Tuzla i trenutno su vodeće, kaže trener Mehić Hajrija, koja je bila dugogodišnja košarkašica ekipe K.K. «Jedinstvo» iz Tuzle, u vrijeme kada su bile prvakinje bivše Jugoslavije i evropske prvakinje. Učenice ove škole su više od 15 godina općinske prvakinje i uvijek su među 3 najbolje ekipe na kantonalnom takmičenju.

Šahisti se zahvalili donatorima

Na Skupštini Šahovskog kluba Srebrenik, podnesen je Izvještaj o radu kluba u proteklom periodu te iznesen plan aktivnosti rada ovoga kolektiva u 2008. godini. Poseban akcenat bio je na održavanju četvrtog memorijalnog turnira «Džafer Hogić», koji se održava u šestom mjesecu, kako bi se on izdigao na još veći nivo. Ovaj turnir već je prerastao u internacionalni, a na zadnjem je učestvovalo više od 100 takmičara iz 5-6 država. Šahisti nisu skrivali zadovoljstvo što su nakon 10 godina konačno dobili vlastite prostorije, zahvaljujući razumijevanju općinskog načelnika ali i nekoliko sponzora, kojima su ovom prilikom uručene i plakete u znak zahvalnosti. Plakete su uručene načelniku Općine Srebrenik Osmanu Suljagiću, zatim Mehmedaliji Jahiću, Hamzaliji Ibriću-Jati, Samidu Osmanoviću-Braci, Šahbazu Emkiću, Nailu Salamoviću i Fadilu Dediću.

KOLAŽ

Dan žena u Srebreniku



Učiteljice su bile zasute cvijećem

Za obilježavanja Osmoga marta zaslužna je Clara Zetkin. Još davne 1910. godine, sekretarica Međunarodnog saveza žena na kongresu Socijalističke internacionale u Kopenhagenu, Clara Zetkin predložila je da jedanput godišnje socijalistkinje svih zemalja organiziraju svoj dan. On je u prvom redu imao služiti borbi za žensko pravo glasa a isto tako imao je zadaću da upozori na dugogodišnju borbu radnica da se ravnopravno uključe u radnički pokret. Početkom 1908. godine radnice su osmog marta demonstrirale na ulicama New Yorka tražeći pravo glasa za žene, ukidanje dječjeg rada i bolje radne uvjete. Osmi mart ubrzo postaje Međunarodni dan žena te se prvi puta obilježava 1911. godine, iako nekoliko dana kasnije. U Austriji, Danskoj, Njemačkoj i Švicarskoj 19. marta na ulicama se okupilo mnoštvo žena, a osim prava glasa zahtijevale su i pravo na rad te prestanak diskriminacije na poslu. Kasnije obilježavan tačno 8. marta, Međunarodni dan žena postaje praznikom u mnogim zemljama. Priča Osmoga marta, priča je žena koje su stvarale historiju. Danas Međunarodni dan žena povezuje žene koje inače dijele etničke i kulturalne razlike, a njegovo obilježavanje podsjetnik je na njihovo zajedništvo u borbi za jednaka prava sudjelovanja u društvu zajedno s muškarcima. „U BiH, pa prema tome i u Srebreniku nije problem samo normativa i zakona i donošenja novih zakona, nego primjene već postojećih. Na žalost, pred nama je težak i dug put i svi skupa moramo da budemo puno energičniji da bi stanje u zemlji popravili. Stanje zastupljenosti žena u Općinskom vijeću Srebrenik te radnim tijelima vijeća i Vijećima MZ-a je katastrofalno. Od 27 vijećnika samo je jedna žena, od ukupno 39 članova radnih tijela 33 su muškarci a samo 6 žene, dok od ukupno 367 članova vijeća 39 MZ-a samo su 2 žene“,

kazala je Alisa Okić, predsjednica Komisije za ravnopravnost spolova Općine Srebrenik. Međutim ono što je karakteristično za ovaj datum je slavljenička atmosfera koja se osjeti na ulici, u školama, kafićima, restoranima...Uoči ovog najvećeg praznika za žene Srebrenik je bio u znaku cvijeća, pa su se, na gotovo svakom uglu, prodavale i nudile gotovo sve vrste cvijeća. Tih dana najviše su profitirale cvjećare, parfimerije, frizerski saloni te razni ugostiteljski objekti.

Jasmina Muratović Miss Srebrenika

U organizaciji Direkcije Miss Bosne i Hercegovine za Miss svijeta, održan je izbor za Miss Srebrenika, gdje je titulu najljepše ponijela Jasmina Muratović. Na ovome takmičenju nastupilo je 13 djevojaka, a titulu najljepše prema žiriju, ali i komentarima posjetioca, ponijela je Jasmina Muratović. Najljepša Srebreničanka je učenica Medicinske škole u Tuzli i kako kaže, na izbor se prijavila sasvim slučajno:



Miss Srebrenika sa prvom i drugom pratiljom te missicom šarma

-Pobjedu uopće nisam očekivala, a na takmičenju sam učestvovala na nagovor prijateljice. Drago mi je zbog pobjede, ali najvažnije mi je da sam se dobro zabavila i sklopila nova poznanstva. S obzirom na ovaj plasman koji sam ostvarila na općinskom takmičenju za Miss svijeta, iskreno se nadam da ću općinu Srebrenik na narednim takmičenjima predstaviti u najljepšem svjetlu, a mojoj sreći ne bi bilo kraja kada bih predstavljala našu državu na ovom velikom takmičenju. Znam da je na narednim smotrama sve veća konkurencija, ali ja vjerujem u sebe, kaže sedamnaestogodišnja Jasmina. Za prvu i drugu pratilju izabrane su Amela Okić odnosno Asmira Husarić, dok je lentu Miss šarma ponijela Elvisa Tursić, koje će nas predstavljati na kantonalnom izboru.

Novo iz Policije

Pametni uređaji za brzinu i alkohol



Složeno stanje bezbjednosti saobraćaja te povećan broj događanja saobraćajnih nezgoda, a naročito onih sa smrtnom posljedicom na području BiH, pa i u TK-u, iziskuje sve veću potrebu za dodatnim angažovanjem služ-

benika policije, posebno onih koji rade na poslovima kontrole i regulisanja saobraćaja. To podrazumijeva i jednu širu akciju svih organa i institucija društva, koje imaju bilo kakvih dodirnih tačaka sa saobraćajem. Polazeći od činjenice da trenutna tehnička opremljenost policije nije u skladu sa evropskim standardima, ovom prilikom ističemo pozitivan pomak koji se upravo ogleda u podizanju tehničke spremnosti policije na viši nivo, koja bi mogla dati pozitivne rezultate, kroz smanjenje broja prekršaja, koji u najvećem broju slučajeva dovode do događanja saobraćajnih nezgoda. Ovdje se misli na prekršaje brze vožnja kao i vožnje pod uticajem alkohola. Naime policajci PS Srebrenik su od nedavno opremljeni sa savremenim laserskim uređajem za mjerenje brzine tzv. radarom marke „TraffiPatrol“ kao i modernim digitalnim alkometrom marke „Alcoquant“ za određivanje nivoa alkohola u vazduhu koji se izdiše. **Savremeni laserski uređaj za mjerenje brzine „TraffiPatrol“** se koristi za mjerenje brzine vozila u saobraćaju. Može se koristiti za mjerenje brzine u oba pravca (u dolasku i u odlasku). Najznačajnije karakteristike su: a) **Digitalno procesiranje signala**—ovaj uređaj brzinu mjeri metodom akumulacije, pulsevi laserske zrake se emituju na visokoj frekvenciji a zatim se proračunavaju kao cjelina.

Kako je riječ o laserskim zrakama, vremenske neprilike poput snijega i kiše nemaju nikakvog uticaja na rad istog.

b) **Veliki domet**—„TraffiPatrol“ omogućava mjerenje brzine do udaljenosti od 1500 m.

c) **Nišanska sprava**—naciļjana vozila se mogu jasno identifikovati upotrebom „otvorene“ verzije nišanske sprave a uz to postoji opcija za „zoom“, što korisniku pomaže da preciznije nišani na velikom odstojanju. Radar ima jednostavno i lahko korištenje te integrisanu memoriju koja ima mogućnost pohrane podataka i na memorijsku karticu. Još jedna od značajki ovog uređaja je i to što on posjeduje i izlaz za ispis očitanih podataka..

Moderni digitalni alkometar marke „Alcoquant“ se koristi za određivanje nivoa alkohola u vazduhu, koji se izdiše, tzv. plućnog vazduha. U ovom uređaju je upotrijebljena najsavremenija tehnologija za sprečavanje pogrešnog mjerenja, pa je time



osigurana maksimalna preciznost mjerenja. Ovaj uređaj sadrži specijalni elektrohemijski senzor koji reaguje samo na alkohol. Uticaj drugih supstanci koje mogu biti sadržane u vazduhu, koji se izdiše, kao što su aceton, ugljični dioksid ili monoksid (kod pušača) itd. je zanemariv, zahvaljujući elektrohemijskom principu mjerenja. Uređaj je opremljen sa memorijom za podatke i serijskim PC interfejsom što omogućava štampanje i prijenos izmjerenih podataka. Procjena je da će se u narednom periodu, stavljanjem u funkciju ova dva uređaja, stanje bezbjednosti saobraćaja na našem području znatno popraviti, što svakako podrazumijeva i smanjenje broja prekršaja brze vožnje kao i vožnje pod uticajem alkohola, koji ujedno i dominiraju kao uzroci događanja saobraćajnih nezgoda. Kako su za navedene prekršaje predviđene i određene sankcije, ovom prilikom podsjećamo vozače i na sada već sveobuhvatnu primjenu Zakona o prekršajima FBiH („Sl. novine F BiH“, broj 31/06), koji za počinioce prekršaja, kojima su izrečene novčane kazne, predviđa upis kazne u registar novčanih kazni. Posljedice ne plaćanja novčanih kazni su da se kažnjenom neće dozvoliti:

1. Registracija ili produženje važnosti registracije motornog vozila,
2. Izdavanje ili produženje važnosti vozačke dozvole
3. Učestvovanje na javnom tenderu ili
4. Promjena registracije pravnog lica ili registracija samostalne obrtničke djelatnosti